



# Saheli

## LABAN JORO

Tijédon, an kodemokarasi sigira senkan mali kono. Nkademokarasi sigilen t'a bée ye koyi, aka kan ka lakana. Jamanaden tow bë demokarasi lakana, nka olu fana ka kan ka lakana jamaana lakanabagaw fe, n'o ye sordasiw, polisiw, sandaramaw ani gatidiw ye.

O lakanabagaw ninnu k'u jija ka ben sinsin u ni njogon ce. Jalamisentigiw ka jalabatigiw bonya, jalabatigiw fana ka Jalamisentigiw bonya; ni njemogo ni komogoyen njogon bonya, karama te temen o kan. N'o kara, anw minnu fana ye demokarasi lakanabaaw ye anw hakili bë sigi.

Maliden bée ka kan ka wuli, k'u bolo di njogon ma, walasa san min finnen aji kana ke sanji kunan ye; n'a majne a bëna, akana so bin a kana jinsen wuli ka tijeni ke. Mugu ni kise bë burudame murutilen minnu bolo, olu k'o bila ; a tali bë Ganda koyi mogominnu kono, olu ka sabali. An k'a laje njogon fe, an ka je ka jamaana baara, ka ja kele, ka banaw kele. Mogokongoto, walima a banabaato te se kabaaake, yiriwa duntekekeneya ni fa kó.

An k'an jija tile min bolen file nin ye, aka don kabangola, n'o te tile suguya do bë yen n'o bora hadamaden na, fo ka taa dijé ban i te don suma na.

Ala k'an don suma na !

Sebennijekulu



*Demisen 20 ye gafe 20 seben tile 11 taama senfe.  
O kera Sahélienne ka Jekataama senfe manden,  
Mekalo la.*





## ANKA MALI LAKANA

Mekalo tile 28, peresidan Alifa Umaru Konare ye jamana politiki nemogow ni jekulu werew mogow wele ka kuma u fe Mali koronyanfan kele lahalayaw kan.

An y'a ka kuma kunbaba damadow tomo ka lase aw ma.

An be don min na ko bi geleya caman be Mali kan. Kalandenw ka baara soro baliya be yen. O y'a dama geleya ye min be jamana in du kelen-kelenna bee kono. Sefa wari jasilen n'a geleyaw be pogon na. O ma se nefoli la. Beejefanga min n'a sigira sen kan ale faamuyali n'a matarafali degeli be senna. Jamana yere yiriwali dabali tigeli fana be senna. Nin si te fen nognow ye.

Ka nin geleyabaw to senna malidenw y'u bolono bila sebenna min b'a jira ko burudame kele ka

duga ka bo jamana kono. Burudame murutilenw ye kele wuli ka jo waati minjo tun b'u bolo. Okadara konona na jamana nemogow sonna ka sigika-foke. Nkakabini waati jan benkan in ma se ka sira soro. Mali koronyanfan kelen be tasuma ye bi. Siran be hadamadenw dusukun na. Jamana nemogo ye wele bila burudame murutilenw ka jekulu kuntigiw ni malidenw bee ma. A ko a kana ke mogosi kono ko mugu ni kise de be se k'a to i be fura soro i ka geleyaw la. Mali ye jamanaba ye. Ank'anjija siyawolomakele tasuma kana mana. Jatemine na, jamana o jaman n'e de ye siyawoloma kele tasuma mana, e ni geleya de be pogon na sa fo ka taa a ke min ye. A ye misali ta liberiya, Uruwanda ani Yugosulavi kan.

Jamana kuntigi y'a jira k'a fo ko dabaliw tigera walasa

maramafew kana se ka don jamana kono i n'a fo feeresen gansan tow. Jatemine na, o be ke jamana minnu kono olu te hera ye abada janko k'a fo u be waati soro k'u pesin yiriwali ma.

Bekan min ni bolono bilal'ala, maliden bee ka bekam don. Siya ma bo siya la. Mogosi kana wuli ko e de be siya do ta ka fisaya siya werew ye. Alani siran min be hadamadenw dusukun na, sariya bolibaaw desselen be ka taa sigi jamana koronyanfan na. O ye ko ye min te se ka to senna. Jamana peresidan y'a jira k'a fo ko fu na siri nin ko dow la.

Job Tera.

ka jija, jekulu fila ninnu y'u kan di. U sonna ka fara pogon kan ka ke kulu kelen ye k'o togo ke ko (B.A. U. A). U ko siga t'a la, k'u be son ka benkan in matarafa, k'u seko n'u damayira bee ke kajamana nemogow deme k'a waleyaw sementiya. U y'a jira fana k'a fo ko u na feerew tige walasa binkanni ni fagali ka dabilajamana koronyanfan na. Uko fana ko abada olu tena mugu ni kise ta tun.

Baara in senfe, hakilinaw tun ye fila ye. Dow ko benkan in te kosebe ye sabu a tiime cogo te jamana goferenaman bolo. O ye politiki nemogo dow hakilinata ye. O ye mogow ye minnu b'a fe ka ko in lanogo. Hakilina filanan mogow y'a jira ko bekam min file nin ye, ale ye fenba ye jamanaden bee bolo; fen min ni bee lajelan ka kan k'i wasa don k'a lakana ani ka dilan ka ne ka taa a fe walasa mogosi kana se k'a lanogo.

Cidew k'olu dalen b'a la ko senkor'o mogow be ka ko in ke siyako kele ye kasoro mali koronyanfan na, koroboro, arabuw fulaw ni burudame ani belaw bee de be pogon kan. U dahirime be pogon bolo. O la, u te se ka ne pogon ko.



Peresidan Alifa Umaru Konare

### An baarakemogon Sidi ka taama, koronfe

Jamana kuntigi ka serewisida ani serewisida min sigira koronyanfan kele dugali kama olu ye mogo damado wuli Bamako ka taa baara kerengeren ke jamana koronfe. Baara in kera k'a darmine mekalo tile 13 ka taa bila a tile 20 na. A tun dabora de ka ta fokaben ke burudame

murutilenw ka jekulu fila fe minnu dugalen be Timitireni ani Tabaliti. Nin jekulu fila ninnu tun ma son ka kele dugali benkan matarafa. Tamaden ninnu selen koron fe, u y'a jira maa murutilen ninnu na k'u te segin Bamako ko fo n'u y'u kan d'u ma k'u be son ka tugu bekam in ko. Alani minisiri Mohamedi Ag Erilaf n'a nosemogo tow ka faamuyali n'u



## LAMINI

# Si turuli n'a ladonni

Si ve jiri lakananen ye Zoferew fe Mali kono, ka d'a nafa kan hadamadenya ni soro hukumu kono. Anka cikebugudamogow be nafaba de soro si la, w'a nafa ka bon Jamana yere kan. Si be dun, a be dugukolo fana lakana.

Farafinna Jamana caman beyen bi, olu ka sanni feere siratige la jamana kokan, si be joyorobebelebelala. San 1980, kolokise min soro la dijne bee, o benna tonni 140.000, ma; o tonni 140.000 na, Mali doron ta tun be ben 60 000 ma. Tonni 140.000 wari kasabi taara fo miliyari 10 na.

San 1977 la, Mali ye sikolotonni 12.700 soro, o wari kasabi taara mali wari miliyari 2 nogen na.

Si turuli :

Sifileli minnu kera si turu kan, halibi olu caman tun ma sen soro kosebe, ka da fen damadou kan :

- Ni kolo falenna, a mennen ye kalo 2 walima kalo 3 ye, a be sa.

- Sisun mo ka go, o de b'a to kungojeni te kun a la. Sisun be se ka san 20 ke k'a soro a janya te temen metere 4, walima metere 5 kan. Si be den damine waati min na, o b'a soro a ye san 40 walima san 50 soro. Nka nin bee la, cogoya soro la si turuli la, min be se ka senekelaw deme ka dugukolo sabatu kosebe.

Siyen soro cogo

Ntugunnin be laben ka kolo kogolen dan o la. Furance min be bila dannenw ni nogen ce o ka kan ka ke santimetere 30 ye. Dingue ka kan ka dunya. Bogo min be ke k'u datugu, o ka kan ka ke santimetere 3 walima 4 ye. A sonni ye waajibi ve don o don, ssgoma ni wula. Kolo falenni ka summa, a be se ka taa fo kalo 3 walima kalo 4 na syenw be se ka to pepineri la fo ka se san fila hake ma. Ni Samiye ji folo temenna, syenw sonni te diyagoya ye.

Siyenw turucogo :

Siyenw ka kan ka turu samiye damine, walimatiléma nene waati.

N'u be turu, dingue be sen, min fiye be santimetere 25 bo, a dunya ye santimetere 50 ye. Furance min ka kan ka bila u ce o ka kan ka ke metere 15 ye. A mankan cogo si la, sanfe bogo nögoma ka nagami dugumata nögontan na.

Siyenw labenni turuli kama :

Siyenw ni bogo ka kan ka bo nogen fe. A ka fisa a ka ke ni dugukolo jalendon. Jirisiyenninnu bulu be tige doonin.

Siyenw be turu dingue kono cogodi ?

Ji be ke dingue sennen ninnu kono, bogo be noni, nka o ye sanfe bogo nögoma ye, min tun be kerefe fo. Dingue in be se ka fa fo 1/3 nogen. Kofe siyen in bogoma be turu dingue falen in kono ni 1/3 fo ka bogo dorongo in ke ka dingue fa ka se santimetere 10 ma. O mana bo yen, a ka kan ka geren ni bogo jalan ye.

Si siven ninnu turuli be ke jalan de la, ti be se ka balo n'a ma ke ni sonni ye fo ka se sanji nali ma.

Si yeremafalenw ladon cogo :

Bee b'a don ko si be falen a yerema kungo kono, n'a ma ke ni hadamaden ka damni, wali turuli ye. O si ninnu fana ka kan ni ladonko juman ye sene hukumu kono. U nafa ka bon kosebe. Ni foro bilalen don mapan na, si be no kala gunkuruw silatunu, wa siw be caya fana, sabu tasuma t'a jeni ka caya. Si yeremafalen minnu file nin ye, tijenin yere la, olu y'u dama jiriforo ye dugu dow la.

O si ninnu ka kan ka lakana nin cogo in na :

- Yoro minnuna n'ujogolen don nogen kan, an ka kan ka furance don u ni nogen ce.

- U ka kan ka kunnajigin son.

- Ntumuw ni nkobo minnu b'u tipe, olu ka kan ka kele.

- Majan kuraw jenini ka kan ka kele kosebe.

Haruna Yosi  
A. J. Kulibali

## AW YE JIBOLISIRAW LAKANA.

Samiye daminetu file, O be mogow caman hakili jigin jibolisirako la Bamako ani Mali dugu werew kono. Ji ye fen ye, ale mana caya ka se hake do ma, a te se ka koron tugun, ab'a temesira bo cogo bee la. O de koson siraw dilanto, jibolisiraw jate be mine, Nanzarakan menaw b'a fo ko "fosedigen".


Bolodese de b'a to jibolisiraw be dilan k'u datugubali to. N'o te, fen o fen ye jitemeyoro labennen ye kinw kono, a bee ka kan ka bili ni "dali" ye. O be mogow tangakasara caman ma digen ninnu sababu la. Ab'u fana men si la k'u to u ka mogow mago ne.

Nka folon mankannin dow be soro kin dow kono, a be fo minnu ma ko "kolekiteri". Olu kono ka bon, wa fosedigen misennin caman de be na foori kolekiteri kono. Kolekiteri bonya koson, a te bili.

Kolekiteri te faratiba ye mogow bolo k'a sababu ke furance jan be to ale ni sow ce.

Jibolisiraw bilibiliya kera sababu ye k'u labila mogow ye kowerew kama. U kera jiaman ani fenkolon filiyoro ye. Minenkojiw ni kolijiw bee be laben ka jigin fosedigenw kono. Nin fen damadou kera sabu ye hali ni san nana ji te se ka boli kosebe jibolisira ninnu fe. Tilema fe u caman be toli jinogo ni fenkunntan werew fe. Min y'a baasima yoro ye, mogow be jibolisiraw geren ka ban k'u kono bo waati ni waati.

Hamidu Berete



## KO BEE N'A TUMA DON

Cékoroba do delila k'a fo ne jne na : " Sarati wére té samiyé na sanji kó."

Cikela ka ko bee ye samiyé ye.

Ni samiyé jnena, o ye cikélaw ka san diyalen ye. Mogo tow be soro ka bo unun ma.

"Cikela sara té soro" bamananw ko ten. Cew be temen noggon kan samiyé de fe wa samiyé ye waati kunkurunnin ye. Ni mogo min m'a sebekoro poron n'i bolo fila ye, a be tila i la. O ye san tijnenen y'o tigilamogo bolo. Ala m'an kisira o ma.

Ko bee n'a tuma don. Samiyé té jo ka mogo si kono k'i ma laben. Mogo de ka kan k'u laben k'a kono.

Baniñkono nana fen b'a kalo fila kan bi :

Sene be ke jamana in yoro o yoro la, san nana o yoro caman bee la.

Yorocaman na, bin falenna ka fan bee labo. Folo, cékorobaw tun b'a fo ko ni bin falenna kaban, tene si te fini siyenni na bilen.

Aw cikélaw, a' mana ye jamana fan o fan fe, a' ka kunnafoniseben, n'o ye "Saheli" ye, a ko k'a lase a' ma ko cesiri tuma sera.

- ton be ke dugu minnu na, olu k'a donko tonjenajew ketuma ye sisan ye sabu nkunan mona. Tonkow bee ka kan ka ban ka bo samiyé baaraw senkoro.

- Waati juman si te kognokow la ka temen sisan kan ni mogo minnu b'a fe u

taw ka ke lafiya la. N'i y'i ka kognø bila ka samiyéji binni makono, i hakili be mogo caman na, olu bee téna ye here in ju la. Minnu yeli ye wajibiye, ako be ke degunba ye olu ma.

Samiye baara ka ca wan'a fen o fen ma ke a waati fe, o yoro be ye sumanw na u dontuma, so kono.

- Kalace to man kan ka ye senna nin waatinin na. Forobaaraw to ka kan ka to noggoyereke ye.

Senekelaw be jini ka faamuya soro sene kecogo juman na. Kabini sanji folo binna, dòw ye bulukuli damine wa halibi ub'a la. O baara in ko be mogo caman kono nka a feerew bee te u bolo. Bee benna a kan ko ni foro bulukura k'a bila, o b'a to sumaya be basigi a la ka men kosebe. Baara don min ka gelen sabu a be ke ni misidaba de ye wa a waati b'a soro ni bagan sebekoro balolen te, o te se ka daba sama dugukolojalan na.

Cikemisi ka kan ka sebekoro ladon tilema fe ka da nin yoro in kan. N'i ye bagan baloli jne sigi, fen te ko min ka gelen i n'a fo mogow b'a miiri cogo min na. Koorkolo be san wa songo yere ma noggon bee ma, o ka ben tijne ma. Nka sokala, tigakala, nokala ani bin, senekela man kan ka ninnu si san ni ko kalabilabaliya te. Hali finikala man kankata kungo kono tasuma jne yen. A ka kan ka ce ka n'a da ga la

baganw ka tilematuma dumuni ko kama.

Mogo minnu y'u bolo don u ka misiw koro, olu ye sene damine kabani. Minnu m'a ko somi soro joona, Ala ka san wére jira anna. Misidaba be senekela minnu bolo ani a te minnu bolo, ni Ala y'a ke ko samiyé laada bee ye noggon soro ka kón sanji binni jne, a'kana a' sigide ! A' ye wuli ka josi nagami, ka sijolan ke k'a labo kosebe, ka soro ka dugukolojalandanni damine.

Nafa fila be sijolan na.

1°) Ni sumansi danna ni sijolan ye, kono te se k'a wogobe, kuma te bubaga ma.

2°) N'i ve siiolan ke

san kana dan sufé nani ma, i ka jno ni juro te noggon ye fansi fe. Kunbennan si te juro la ka sijolan bo n'a kera a ketuma fe.

Ko bee n'a tuma don wa ko bee yere n'a taabolo don.

Berehima Wulale

**SAHELIEENNE** ka baara jésinnen be gafe dilan ma ani kunnafonisebenw. Baara in lawulila k'an fakanw yiriwa walasa bee ka keje, si kana to dibila. Jamana baara taabolo ka jeya bee ma.



## KALAN NI YEREJENABO



### JANJONI

Janjoni ve banajuguba ye, min be mogo saga teliya la. Janjoni be denpereninw mine. Bana in ju be soro fen misennnin dōw fe n'o y'a kisew ye.

#### Bana taamasiyenw

Den be dese ka sin min. A da wagali be geleyakosebe. Dagerena kolow be ja, jinw be kason jøgon n'a, i n'a fo a tigilamogo be yele la.

#### Bana taabolo

Farikolo fan bee be ja. Den be se ka kosegin sanni a wololi tile 14 nan ce.

#### Bana kumbencogo

Den ba ka kan ka boloci ke, boloci min be ke ka Janjoni kumben walasa den be kisi. Boloci be k'e k'a soro muso jigginni to ye tile 15 ye. Boloci ye siyen fila ye, nka u te ke jøgon fe; kalo kelen ka kan ka don

## BANGEWALAWALA

Ka bange walawala, o te bi ko ye. A nafa kama, feere caman, tun tigelen be an ka folomogow fe. Olu tun be sere jangataw don ba, den, fa ani duden tow kan.

Yoro dōw la ni muso tun jigginni, a tun be bila ka taa a faso la fo ka den jenatige. O y'a soro waati tun ka nogo; muso-caman-furu tun be sanga la. Mogo caman fana tun b'u yere bolodeme ni magojefen werew ye i n'a fo tafo, ntalenfara, didulo, jiriw an'u jøgonna werew. Hali Sisan, dōw be o fenkorow kan. Bi, miiriya kura dōw sorola ka jesin bangewalawala sabu wale koro ninnu geleya ka bon. Dōw nafa be ban kasoro boli ma ke a kalama, i n'a fo tafo tana tijeni. Dōw yere be se ka ke sababu ye ka mogo kelle walima ka bana do bil'a

boloci ninnu ni jøgonce. Ni muso min ma boloci nin ke, hali n'i ye kelen ke, i kan'a fo k'i den kisira.

Ni den wolola, a wololi kunjøgon 6 nan boloci saba be k'a la, nka olu fana te ke jøgon fe, kunjøgon 4 be don bolociw ni jøgon ce.

San duuru o san duuru, wali san tan o san tan, segin ka kan ka ke boloci in kan, o ka fisa ni nege pikiri ye, bawo o te men, wa a te boloci bo.

Janjoni ye bana juguba ye ka da a ka tijeni kan saheli jamanaw kono.

Bana in furakeli ka gelenkosebe, wa a furakeli musakaw ka ca.

Ko bana kumben ka fisa bana furake ye. Boloci ye Janjoni kumbennan juman ye. Ala ni

la. Olu ye ntalenfaraw, didulow ni jiriw ye.

Musokalo jatemineni fana ye bange furance janya feere do ye. Nka ale koje ka misen doonin. Musokalo jate be mine ka konota don don. N'o jate donna, ce ni muso ka kank'u yere mine. Ni don min ye konotadon ye, muso fari be kalaya doon. tile damadossanni o ce, musoya be namaya doonini i n'a founji b'ala. Ni mogo min be jatemine ke, o don be taa ben furance min be ladaw yeli ni jøgon ce cemance ma. Jate be damine kolilaban don ka taa a bila kolikura damine na. Farati la tile 4 ka kan ka bila (Kafoli te ke minnu na) sanni o don in seli ce, ka tile 2 fana bila a temenen ko. O bee be ben tile 7 jøgon ma,

Tubabu feere juman caman fana be yen ka jesin

"P.E.V" sababu, boloci furaji be bee ka bila la, aka ni, w'a songo ka nøgøkosebe ka temen furakeli kan. Anka maramafen minnu be yen, ni laadalako dōw be ke n'uye, i n'a fo bolokoli, ani tamanci ka fara pinsusukan, o minen nimuka kan ka lakana kosebe, k'u jeni, k'u saniya aye ma. Jeliw ka kan ka ko kaje. Wa sabara don yere be se ka mogo kisi negetige ma.

Sidalamine AG DOHO  
J.A. Kulibali

bange walawalali ma. Siga te o feere ninnu na. A dōw ye furakiséninw ye, dōw ye mananinye, dōw yere yepikiri ye. Nin feerew caman man kan ka ke k'a soro dogotoro m'a yamaruya.

Denwolo ye fen ye min be muso laafu sanko a tugutugulen jøgon na. Sereden fana bo man di a yere la. Ninnu bee be se ka na ni geleya ye du kono.

Alu Danbele

3 CONDOMS TESTÉS ÉLECTRONIQUEMENT

CONDOMS

PROTECTOR®

Mananin



## KUNNAFONIW KAFOYORO

### Ka bɔ Faransi

Usi Ture maliden don. A tun sigilen be Faransi. Mekalo tile 7 polisiw y'a mine k'a sababu ke a ka sebenw tun ma dafa. Ni mögo minena o cogo la, u b'i bila ka taa i ka jamana na. fuma min n'u tun b'a la k'o kojew jenabo. Usi Ture fatura ubolo yen polisiso la. Mekalo tile 29 malidendamado y'ufarajogon kan ka taa u ka nison goya jira polisiso in na. O kelen, u ni polisiw karila mögon na.

### Jikan kasara

Mekalo tile 15 Kurun do tora kogoji la Gabon masurun na. Maa 50 hake tun be kurun in kono. U tun b'a fe k'u dogo ka don Gabon jamana kono. A b'a don k'o jamana donne ka gelen. Kurun dafirilen mögo 44 mögon tora ji la. Mögo 14 bora kasara in na. O mögo 14 ninnu na, 9 minena : maliden 8 ani Nizeri mögo kelen.

### Ganda koyi

Ganda koyi, köröborokan don. A körö bamanankan na "dugukolotigiw" Mali Saheliyanfan fe, Gwo, Tumutu, ni Kidalimarawkono, n'an b'a fo o yorow ma körönfela, köröborow belaw, burudame ni arabu ye mögon siginögön ye. Burudame murutilenw ka jonnaya, u ka binkanni, n'u ka mögofaga barika bonyana u siginögönw kan fo k'a dantemen. O de y'a to jekulu do sigira körön fe, ko "Ganda koyi". Jekulu in y'i kalen k'a te djiene ni "Erebeliw" ka dantemenwale ye bilen. A be cogo bee ke walasa ka mögo ka na folow n'u bolofenw lakana, ka fara dugukolo yere kan

### Garidiw ni Polosiw

Ntomiköröbugu, kogo de be polosiw ka lakoliso ni garidikan ce. Taratadon, Mekalo tile 10, sufela la, garidiw ni polosiw

karila mögon na, o ma bɔ foyi fe Polosiw ye garidike do bugo, fo kataa olada dögötöröso la. O ma ben garadiw ma, kele wulila. Joginni bɔr'a la, bawo mögonbugo yer'a la, marifaw cira, "gerenadi" minw be mögo jieji bɔ olu fana filila; siso caman jenina, ani bolofenw. Kanpara sorodasiw nana don kelekelaw ni mögon ce, ka balawu duga. Nin su in na, N'tomiköröbugukaw ni Darisalamukan ma se ka sunögö. Ala k'an kisi sitane töö ma

### Denmisénw ka walani manji

Halibi kalanko kadara kono, an ka lakolidenw ni lagosi be mögon na.

Andemebaa jenama döw, n'o ye siniyaw ye olu ye naniya numan do sigi sen kan, walasa an ka lakoliden döw be se ka taa u ka kalan to ke siniwa jamana kan.

naniya in tun dabora bak tigiw de kama ; n'o ye "lise" lakoliden köröbalenw ye. Nka komi kalan te sen na sisani, u y'an ka lakolisoba n'o ye ENSUP ye, o kalandendamado ta, ani dögötörösoba kalan be ke kalan so min na, u y'o fana kalanden döw ta. U ye kiimeni ke nin denmisénw kun, bee tun ka kan ka kuru 100 soro, nka i k'a don u si ma temen kuru 30 kan. Siniyaw n'u ka naniya numan seginna. Lakolisobamin be Segu n'a be wele ko "Esitex" ni jamana caman kalandenw be mögon soro yen, mali kalanden woero tun be kalan so min na. A jateminenko san temennen 1992-93 maliden woero ninnu na fila bilala k'u ka walani manji, naani majetaa soro, olu tor'u no na. Ninsite balannako ye, bari bee be mali kalanko sisannama kalama.

Nk'a tena ke mögo si ko !

Ce o i ka syo be daga fara, i jo n ka do bɔ a la, o ye tine ye

; nka ce o i ka syo be daga fara, i jo n ka do fara a kan i mana fen min soro la o y'i yere no ve de.

Ba sara a' ye n'an k'a kunkolo waraka ka bɔ daga la, tine don batigi ta ye ba ye, nka nin si te ba ma numan ye. maloyako dere !

### Kita C.A.C warimarayorɔ da karila.

Jumadon awirilikalo tile 8, kita bee tun kononafilinen tun don k'a sababu ke C.A.C warimarayorɔ da karili ye. Baarakeda in kontabulu n'o ye kuluntu Fofana ye ale y'a jira ko nson ninnu m'u ka baara ke u kunfe. O kera hali polisiso mögöw hakilina ye.

Baarakeda maa 7 ka kalo 2 sara tun be wari in na. Nafolosonalen, wariye tun ye sefawari 79172 ye. Syeki wari hake tun ye 156.054. Wari buruburumin tun be warimarayorɔ in na, o tun hake ye 130401 ani 144 ye. Yorɔ kolɔsilikela y'a jira k'ale ma bonsonw ka baara kalama. Kita komandan ye syeki kura di walasa baarakela ninnu be se ka sara cogo min na. A ko segesegeli to be kita polisiso la fö.

### Ka bɔ Faransi

Faransi, konowarikaw ka ntolatannaba do n'o ye Beni Sala ye, ale jangira, san 7 kaso ; a muso ta kera san 3 kaso ye. a yere denke San 6 bugo, k'a sebekorɔ jogin, fo k'a lada dögötöröso la. O kera a muso nena ; o ma foyi ke ka den in bɔ bolo la. Nigeleya sugu döw be yen, Faransi sariyatigelaw te dine n'olu ye abada, i n'a fo denlajaba, musomaninw selijili, a n'o mögenna caman.



## KUNNAFONIW KAFOYORO

Nizeriya :

Sama donna jötü la.

A be fo ko ni sama donna i ka fora la sufe, a y'i sutura. Nka n'a donna tile fe, a genwulu te mögo bolo. Nizeriya jamana min be wele Adawama n'o be danbo ni Kameruni ye, sama 60 ye tijeni ke yen. U donna kaba forow ni buyagi forow la k'u tijen. Tijeni barika bonyana fok'a damateme sabu ataara jo miliyon keme ni tila jögon na.

**Malawi Kera Demokarasi Jamana ye.**

Peresidan Banda ye malawi Peresidan fölo ye. A ye San 30 ke fanga la. Jamanadenw tun benna a kan, ko a be to fanga la, fo ka taa saya se a ma don min. Nka Demokarasi nalen, fura bora a ka woro nëma. Wote senfe, Bakili Muluzi ye sesoro. Mögo kelen fanga banna Malawi, woyø ma ke, mugu ma ci. Peresidan koro ko a dinena n'a binni ye wote senfe; ko a na ko bee ke, ka peresidan kura deme a ka baara la.

**LIBAN : Silame nemogo do faara**

Banisirayila sordasi komando döw taara silamew ka nemogoba do mine Liban ka taa n'a ye, hali she ma wuli ka bo a fan kan. Komandow cunna Liban ni awiyon fila ye. U wulilen ko ka taa ni silamew ka nemogo in ye, Liban sordasiw ye gele fili u ma, o ma mako je.

**Ka bo Yamani**

Yamani ni Makan be danbo. Yamani ye fila ye : Saheli yanfan Yamani, ani worodugu yanfan Yamani. A san 4 ye ninan ye, utun faralen bejögön kan ka ke jamana kelen ye. Bi, furu borotora. Fitine be badenmaw ni jögon ce. Saheliyanfan yamani sordasiw dagalen be woroduguyanfan Yamani faaba da la, ko fo u k'a minenw ta, ko bawo janfa kera.

**Ka terensira bo kogoji jukoro**

Faransi ni Angile jamana ye negesira da kogoji jukoro, k'u ka jamana fila tugu jögon na. Angile jamana ye gun belebeleye kogojicema. Kogoji bolofara do be a ni Faransi ce, a be fo o ma "Mansi". Kabini tuma jan, jamana fila ninnu ye dabali caman tige, yasa u be se ka tugu jögon na. U tun miiri sera ka babili do dilan, ani feere werew. A laban na, u ye dinge belebele jamanjan sen "Mansi" jukoro; ka negesira da a kono, terenw be boli o kan. San 10 de kera baara in na. Fose in janya ye kilometere 50 ye. Faransi wari miliyari 100 donna a dafe. Baarakela mögo 15.000 tun b'a kene kan. Mögo caman ni tora a dilantola. Bi, miniti 50 wälima 30 kono, mögo ba yirika be se ka bo jamana do la ka taa do la, lafiya ni daamu na.

**Demokarasi Donna Afiriki "du sud"**


N'i y'i sigi k'i miiri ka Afirikidisidi kunun laje ani a bi, i be masaya segin Ala ma. Waatiw ker'a la, golofin ni bagan bee tun ye kelen ye Farajew bolo. Faraje tun be i n'a fo Ala. Nafolo, dönni,

Isiniw, dugukolo, maramafenw, nin bee tun ye tubabuw ta ye. Niyorö foyi tun te farafinw na u fa dugukolo kan. Dije bee nan'a yek' a fo ko labanta te o ye. Dije bee jera ka nansara signifew ka fanga jugu lakari, ka u kón. "Mögo be bo jo la i te se ka bo dije daben jo la". Wote senfe, tenendon, Mekalo tile 9, san 1994, farafinw kajemögöba, Nelsoni Mandela sigira Peresidanya la, san duuru kono. "N'i y'a men ijonnin kunnandi, a fo do sababu juman". Bee tun be a don k'a fo, a men o men, don do, fanga bëna segin farafinw ma Afiriki "du sud". Nka, ka o ke nögoya ni basigi la, geri ma ke murutiliba ma ke, Ala ni Ferederiki de Kileriki barika.


Ale de tun be peresidanya la sanni Mandela ka sigi, faraje don. A be fo "ko mögo te bo fanga la, fo i da jolima". O ma ke ale ta ye. A dijena ni demokarasi dönni ye Afiriki "du sud", hali n'a ka pariti ma jësoro. A ye tubabuw karaba, u ka dije ni farafinw ka fanga tali ye. Ale de ye Mandela bo a si kasol la. A y'ajira ko jamana ka kan farafin ni faraje bee la.

Mögo si tun bennen te peresidanya la ka temen Mandela kan Afiriki "du sud" kura in kono, k'a da a ka sabali n'a ka kodonkan. A bolen kasol la, a ko a yafara; bee te se o la. A ko tubabu ni farafin kana ke jögon jugu ye, u k'u bolo di jögon ma ka faso baara. A ko demokarasi ka ke jamana ka jetaa kura jiidilan ye. A ko a n'a sekodamayira bee ke, yaasa Afiriki "du sud" be ke sababu ye ka jetaa ni yiriwali sinsin farafinna kono. Ala ka barika don Nelsoni Mandela la ani Ferederiki de Kileriki.

J. A. Kulibali  
Mahamadu Konta  
Alu Danbele  
Job Tera.



## FIYENTOW KA JEKULU



*Nin ye fiyentow ye geseda la.*

“Dusukun de bë yeli kë. Ñe te hadamadenya fën barikamaw ye”. Kuma in koro ka dun. Fiyen ye bana ye min bë nooro duga ka bë hadamaden ñe na. Nka o koro te k’ a bë mogë ka hadamadenya don bogë la pewu. UMAV y’ i jo Mali fiyentow jigi koro.

Kabini san 1972 AMPSA sigira sen kan. O ye jekulu ye min bë deme don fiyentow ma. San 1973 la Okutoburukalo la, a ye kalanso mankannin do dayele ka fiyentow kalanni sifile. A kelen ka wasa soro o sifileli in na, a ye kalanso

bonyak’ a tögökë INAMye. O kera san 1978 la. An bë don minna i ko bi, kalanso in min n’ a bë Falaje (Bamako), fiyento denmisew bë kalan kë yen fo kilasi 9 nan na. N’ u ye defu (D.E.F) soro u bë taa cemance kalan kë lisew ni lakoliso wærew la. O mana bë ye döw bë taa u ka kalan laban jamana lakolisobaw la. An bë don minna i ko bi saba bë kalan na Tunisi kalansoba do la. Bi-bi in na, u mogë 20 njegon tilala u ka kalan na. Döw ye baara soro, döw ma baara soro folo. Minnu ye baara soro jamana serewisidaw la, u ma gelyea

si soro u ka baaradaw la. O b’ a jira ko fiyentoya te hadamaden bali ka se k’ a ka djelatige kow ñenabo.

Fiyentow ka jekuluba in haminako te kalanko dëron ye. A bë banabaato ninnu dege baara misenw caman na minnu b’ a to u bë se k’ u yere ta ka bo delili la. O siratige la, u kelen bë ka koperatifuw sigi sen kan Bamako komini folo, 3 nan ani 6 nanna. U ka sunba yere koro n’ o ye Falaje ye, U ye SOPRAM sigi sen kan. Koperatifu ninnu ni SOPRAM na, fiyentow bë geseda ke. U bë farasu dilan.

Sanni komatekisi ni itema datuguli ce, u tun ye gaari caman san ka mara walasa u ka baara kana segin ko. Komatekisi dayeleli kuma min bë senna, n’ o ma kë joona u bë son ka gelyea doonin soro.

Nin baara ninnu bolen ko yen, jekulu inye dogtorosow dayele Falaje (Bamako), Kayi, Sikaso, Segu, Tumutu ani Gawo. U bë new opere ka lunetiwi di minnu bë ñe barika bannen deme ka yeli kë.

Jekulu in bë deme don duguba kono mogow ni dugumisen mogow bee la.

Job Tera



## BAMAKO LUWANZE KO

N'a fora i ye ko Ala kan'i ka du don du kono dubabu dumanba; a lamine!

An be don min na kobi, Bamako sigi kera geleya dan ye. Djiné geleyara, fen te bolola, sigi geleyara. Bi ma luwanze bila sen na, nka kabini luwanze daminena, a n'a kunkow be jogon na. Caman be Bamako kono bi, olu halala so t'u bolo, u bee de be luwanze la. K'a fo ko dusu te mogow kono k'u halala so jo wa, ayi, cogoya de te mogow bolo. Eee, Mali goferenaman baarakela be sojowari bo minni ? Bamako dun falen be goferenaman baarakela. Ja. Luwanze yere te doweré ye ka don mogow were ka du kono, k'o sara kalo la. Luwanze be se ka ke mogow kelen ye, ce walima muso, a be se ka ke mogow n'a ka denbaya ye. Denbayatigi mana wuli ka taa don du were kono n'a ka denbaya ye, o ka gelen de. Ni y'a laje a kunkow ka ca, bari i be se ka taa a soro denbayatigi were be du in kono. Hadamadenw dunkakow cogoyaw te kelen ye, u sonw te kelen ye a

laban be ke ni musow ma keleya jogon na yeko koson, k'a soro sorow te kelen ye; denmisew na keletuma bee, so somogow be se ka jogon soro.

Sotigi dow fana be yen olu b'a fo ko ceganan walima musoganan te don u ka so kono. Tuma dow la ni mankannin donna sotigi ni luwanze ce, a be luwanze gen ka bo du kono. O ye fen ye min man kan ka ke ; dow fana je na ni mogow be luwanze la kojon don, u ka kan ka kobebali k'a la.

Nin si man jugu, tuma dow, ib'a soro so min be ta luwanze la, o so ka dogo, a koronnen don i be Ala kali ko syekulukulu, w'a songo ka ca. Sotigi caman be yen bi, olu b'a fo, ko luwanze ka jebila sara folo. Nebila te doweré ye, i ka kan ka hake min sara kalo o kalo, i be kalo fila, walima kalo saba sara. Sotigi dow be yen, ni kalo ye tile fila soro, u be na luwanze kama, o b'a soro hali sara make, ni luwanze k'u ma sara ma ke u ka waatinin d'a ma ; un-un o ye tasuma ye dow sonkun kan. Ube mankan suguya bee wuli ka jo ; fo dow b'a fo yere, ko luwanze ka so bila, a ka yoro were pini. Tije na, so te n bolo, n nana luwanze la ika so kono, n b'i bonya

k'i gasi sigi, i fana ka n danbe to n na !

Luwanzek o dow be yen ni juru yelenna u la, u be tunun ni sotigi ka war i ye ; o koni fana ye kokunntanba ye, mia man kan ka ke. Dow fana be so to luwanze la, u te, mogow bil'a kono, konnege b'u bolo, i be t'a soro tuma bee u ni musow de be na so kono, oye ko ye min fana ce ka jugu kosebe.

Luwanzeko kope ka gelen kosebe, sanko Bamako kono. Fosi yere de te hadamaden halala du bo. O la i sago b'i ka denbaya la, i te mogow tooro mogow t'i tooro.

Mali baarakelaw ka ca, i be t'a soro du be mogow caman bolo u faso lankau be taa duguba kono, walima yoro were, baara kadara kono. N'u sera yen u b'u jo n'u ka fen bee de ye wa u caman be luwanze ta. O ye fen ye faamaw ka kan ka min file filenan na. N'i ye Mali yere ta kabini yemahoronya fo sisan, goferenaman si ma sigi, min ye baarakelaw ka soko k'a kunko ye; o dun ka kan ni keli ye. N'o te do kera tirikitorek ni majumako la sa de.

J.A. Kulibali

## JEKATAAMANAW KA FOLIW

Laminecogo saba be dugutaala fe ka jesin a fobagaw ma;

-Kori dugutaa walima taama diyara ?

- 1 N juman taara, n juman seginna ;

- 2 A fisayara ;

- 3 A diyara sabu n taakun jenabora.

Nin jaabi saba ninnu be to ka men taamadenw da an fe yan.

Jaabi folo : N juman taara, n juman seginna.

Nin te jaabi jenama ye. N'i juman taara kaban, o koro ye k'i tun ma taa banafurake. O tumana i juman nana, fokun si t'o la sabu bee je b'i la.

Juman nana ye taama ma diya dogokan ye.

Jaabi filan : A fisayara.

Nin yere te kuma jelen ye. A fisayara be se ka ke a diyara dooni fe ye. A be se ka faamu mogow fe

fana ko taama diyalen be nka taamaden t'a fe mogow k'a don.

Jaabi sabana : A diyara sabu n taakun jenabora.

Nin koni ye jaabi jenama ye sabu taama diya fora, a fora ka da kuminkann'o yetaakun jenaboli, o yere bilala kene kan.

Anw jekataamanaw ka bo Kaaba, an kajaabi ye jaabi sabanan in ye. Anw ka taama diyara sabu an taakun jenabora.

Taama te se ka diya taamaden nani Alani jatigipuman sababute. Kaaba dugu bee y'u ka nisondiya jira an seli la u ka dugu dumanba in kono.

Taama diya be don taamaden ka minen girinya la. Anw kunnankolontaara, nka an doninen nana tewu ka bo Kabako dugu la.

Fosi te ke ni sababu t'a la. O tuma na, jekataamana bee lajelen

ka foli ye nin ye ka jesin mogow ma n'olu ye :

- Kaaba dugutigi n'a makafoma ;

- Kaaba kubetigi ani kana baarakela minnu be yen ;

- Kaabakalansobaminjesinnen be karamogow kalanni ma, o baarakela bee ;

- Kaaba musow

- Balansan dugumogow bee ;


- Salamale ce n'a muso, demisen ni mogokoroba ;

- Jline ma ke Keelakaw ko ;

Anw ma kokoroba Kaaba. Kunafoni lakika ninimi bonya kono, anw sera Kaaba.

"N bugora n somogow je na, a te ci sama caman bo". Gafe minnu dilanna taama in kan n'a dow bena bo hali a te men, olu n'a to jesu a' ye.

Berehima Wulale



## Sikolo tomōn ni kōlokise dilanni, ani situlu puman sōroli

Si nafaba ye a tulu ye. Situlu ye fenba yetulu dilan iziniw fan fe, ka d'a kan a be nafaba ladon yiriwali hukumu kono.

Nka an b'a dōn dijē kono fenw be yelema-yelema cogo min, hadamadenw ka dōnta fana be yelema-yelema ten. O la sa, an balaka minnu be an ka dugu misenw kono, n'ube si tomōn, uka kan ni foli ye. Nka ni mōgo be baara fen o fen ke i ka dōnniyakura sōro a kan k'a yiriwa, o de ka fisa kosebe.

N baliinamusow, n'aw be si tomōn a b'a' jija :

- a ka ke sanni sikolo falenni ce

- sikolo tomōnnin'a baarali man kan ka janya nēgon na ; n'ote n'o kera kōlo be se ka falen.

- N'aw be kōlo baara ke, aw kana siden kari a basun na, a' be dugumataw dōrōn tomōn, bari olu de mōnen don; w'o tulu fana ka ca.

- Ni sitomon banna yoro min, a dilanni ka kanka damine o yorōnīn bēe.

O la sa, si man kan ka temen kūnpogon kelen kan toli la, wa a booro (bu) ka kanka bōni bolo ye.

- Ni booro bōra kōlo la ka ban, a be tobi :

- N'a tobira ka ban ka ja joona o de ka ji kosebe.

- Aw kana sin ka kōlo wōro, k'a sōro, a' t'a baara waati; walima a feere waati jōnjōn dōn.

- Kōlokise ka kan ka mara yoro la, min jalen don, wa fijemayōro don fana. Aw kana kōlo ke dugukolo gansan kan. Sumaya man kan ka se kōlokise ma ka se hake dō la.

Nin wale minnu file nin ye, olu b'a to an be situlu puman dilan, fo k'an yere nimisi wasa.

**Haruna Yosi  
J. A. Kulibali**

## MUN BE SE K'A TO DUGUMISEN MUSOW BE TAA JNE ?

Muso joyōro ka bon kono kosebe dijē kono. N'i ya men du, muso don, jamana, muso don. Muso de be bange, ale de be denw ladon, k'u ladamu. Du kono, muso ka baaraw te ban : jita, nōsusu, tobili, yōrfuran, minennōgōko, fininōgōko. Ale de be wuli bee je, ka da bee ko. O bee lajelen kōfe, muso be baara caman werew ke :

1 - sene : A be cewdeme ka du forow sene, a b'a yere ka foronin cike, a be cibō sara la. Ni fo bora, a be nakō sene.

2 - A be jago misennin ke

3 - A be bololabaa caman ke minnu degun ka bon :

- a be sikolo tomōn, a b'a tulu

bo :

- a be nere kari, k'o kolo bayelema k'o ke sunibala ye.

- a be safune dilan, ka gala don.

- a be datu dilan;

- a be segekata geren.

N'i y'a jatemine, muso ka baara ka ca, u degun ka bon, wa u sōro ka dōgo. O la sa, muso be se ka mun ke walasa a be lafiya, k'a ka sōro yiriwa, k'a ka jetaa sabati, k'a ka dugu n'a ka jamana bō nōgo la. O ye kalan je. Ni muso ma kalan a ka ko bee ye tōkaje ye.


Musokakalanbaliyaye dibijuguba ye. Kalan de b'a to muso be fen caman penabo du kono, k'a sōro a

kono ma gan : denbaya ka kēnya sinsinni, a yere ka bange kōlosili, a sīgiyōro n'a lakanani.

Balikukalan b'a to muso be kalanje, sēbenni ni jate la. Ob'a to a b'a bolo dayorōdon. Balikukalan yesababu fana yemibe se ka dōnniya kuraw di muso ma, dōnniya minnu b'a to abeyelema don akabaaraw kēcogo la ani a ka famuyaliw la.

Muso ka kalan nafa te fo ka ban. Jamana min muso kalanbaliw ka ca, o ka jetaa ka suma kosebe : N'i ye cē kelen kalan, i ye mōgo kelen kalan. Nka n'i yemuso kelen kalan, i ye du kalan, i ye dugu kalan, i ye jamana bee kalan.

**Madamu Tararawele Jelika  
Sise P.R.B.( Baginda)**



## SONI ALI BERI, KOROBORO JAMANA MASAKE

Manden fanga binnen ko, fanga yelemana koroborow ka bolo kan, Gawo. O y'a soro Bitonw tile mana, kuma te Da, Babenba, Samori, Seku Amadu ni Laji Umaruw ma. San 1100, silameya donna Koroborow fe yen, nka o m'a to u ka diine korow bila. Masakeya bonda sigira Ali Golon fe. Ale de ye Gawo bo Manden ka mara kono. Masake 18 de sigira fanga la Gawo, sanni SONI ALIBERI ka sigi. O y'a soro Gawo ka mara dannen be koroboroduguw doronde ma. Ka Gawo ke jamana belebeleba ye, ka Suraka, Burudame, Hawusa, Moosi, Fula Maninka ni Bamanan bee don koroborow ka mara kono, o sababuya bora SONI ALI BERI la.

SONI ALI BERI ba tun te koroboro ye; silame tun te; jamana in mogoyere tun te; a tun be bo Sokoto, Nizeriya jamana kan. O de y'a ke SONI ALI BERI y'a ka denmisenninya bee ke tontigiw ni jinew bolo. A tuubira, ka don silameya la, a sigilen kura fanga la, san 1464. Nka o ma men senna; a tilala ka segin joson ni bolisonma, ka a ka masakeya sarakaw bo.

San 30 kono, SONI ALI BERI ye fan bee ke kelen ye.

A ka sorodasiw tun ye kulu saba ye : sotigiw, jikan sorodasiw, ani sennamogow. A ye Tumutu mine san 1468, ka Jene mine san 1473, ka Masina fulaw kelen o kofe, ani Gurimancekaw.

O waatiw la, Tumutu tun be Manden ka mara kono. Dugu Yiriwalentundonjago, dogni, ani silameya sira kan. Kelekeminen caman, tun be bo Arabula ni farajela, ka temen Tumutu fe, ka soro ka se Manden. Tumutu minenen, kelekeminenw tigera Masarenw na. O la, SONI ALI BERI sera ka Manden ni Manden lamini mine, k'u fara a ka jamana kan. O kelen min ke, koroborjamana tun be a ta kogoji da la (Gambi ni Senegali), tilebin fe, bo Nizeri jamanakono, koren fe; saheli fe a ni Maroku ni Alzeri Arabuw tun be danbo. Worodugu fe, k'a ta moosi dugula, bo Nizeriya, tukorola bee tun be koroborow ka mara kono. Walasa sene be se ka yiriwa a ka jamana kono, SONI ALI BERI tun ye badinge senni damine, ka bo jeliba la k'a kunda walata kan, saheli kono. O baara ma se ka laban, k'a sababu ke Moosiy ka binnkanni ye walatakan. SONI ALI BERI tun ye digi caman dilan, ji

walangata yorow la, a ka jamana kono.

San 1492, SONI ALIBERI sara. A tora ji la, a segintok ka bo kelenkeyoro la. SONI ALI BERI ma togo duman soro a salen ko. Moriw ni Walijuw ye jalaki caman bin a kan, ko Masake kafiri tun don, ko a tun te hine ulemaw la.

A tun be in'a fo SONI ALI BERI tun wolola kelen doron de kama. A ye o ye, n'a te kelenkeyoro do la, i b'a soro a be ka do laben. A tun te sigi so abada.

Mahamudu Konta

Saheli kanubaaw aw hakilinataw ye min ye Saheli kan, aw ye olu fo an ye. A be fo mogoyere kelen, hakili kelen, mogoyere fila, hakili fila.



SEKO NI DÖNKO ANI FARIKOLO JENAJE

## BOBU MARILE, EREGE, ANI ARASITAW

Bobu Marile tun ye farafin ye. A togo sebesebe tun ye Oroberi Nesita Marileye. A be bo Zamayiki. A sara mëkalo tile 11 san 1981. San o San o don mana se, taasibila be ke ka taa a ma dije fan tan ni naani kono. Bobu fa tun ye faraje ye. Angile tun don, nka a be a ba de don, o tun ye farafin ye. A lamona o de bolo, segen ni jani suguya bee la, bawo se tun te o ye. Bobu lakodonna dije kono a ka folisen fe, n'o ye erege ye.

Erege ye faantanw ka foli ye. Ni segen ni faamaw ka tojoni ye u tooro, u be u yere nisondiya erege foli in kono, u b'a fok'olu jigi ye farafinna korelenw ye.

## FOLI KA KE NANAN YE

A siye folo tun ye nin ye, Kulukoro ntolaciton sen ka ye farafinna ntolatanba do la. Nanan taara Gabonkaw lamaga ufe yen. A tun be san 30 bo, Mali ntolaciton si ma se ka o nogon ke. Kari temenen, Mekalo tile 15, Nanan ye Tunizikaw lamaga Bamako, 3 ni 1. O nogon

K'u mako te tubabuw n'u ka fentigiya la. U be tojoni kelaw danga, ka dusudonjanibaatow kono.

Farafin minu minena ka taa n'u ye jonya la Ameriki gun kan, Arasitaya yera olu de la. U ka dönnikelaba do Marikosi Gariwe y'a jira ko masake do dolo bëna falen farafinna ; ko ni o kera don min na, Farafin bee ka kan ka segin fasoba la. O fôra cogo min na, o kera ten. Masa Solomani bônsôñ do sigira masaya golo kan Ecopi, n'o ye Ayile Selasiye ye, "Ja Arasitafarayi". Arasitaya koro ye ko i wakilu ke farafinna seko n'a dönkow ye. I kera

tun kera Tunizikaw fe, Nanana katemén. Penaliti 5 tankelen, sekera Kulukoro la. Ka 3 ni 1 ke Mali ntolaciton na, o ka tila k'o nogon sara, malidenw tun famana k'o nogon ye. Nanan ni foli ka kan. U y'a jira ko dogoya te kele sa dusukuntanya de b'a sa.

Mahamadu Konta

diine o diine na, ka Ala bato suufiw ni Muwaniw. Suufiw be kungo kono dayimu kayimu u be balo jiridenw na, ani Ala ka sebaaya. U te baga mögo ma, u sirilen te mögo la, u te siran foyi ne ni Ala kelen te. U kunkolo nagasalen don tuma bee. Mögo minnu be u ta ke döröguta ye ani bandiya, olu ma foyi faamu Arasitaya la. Olu be u kunfe.

Mahamadu Konta

LABOLI KUNTIGI :  
Sumayila Samba Tarawele  
\*\*\*

SEBENIJEKULU COGO :  
Job Tera

SEBENNI JEKULU :

Morilaka

Jokolo Adama Kulibali

Alu Danbele

Sidalamine Ag Doho

\*\*\*

Mahamadu Konta ( Baginda )  
Berehima Ulale ( Segu )  
\*\*\*

Fatogoma Jara, Hawa Fofana ( Faransi )  
\*\*\*

LABENYORO : Sahéline  
Avenue O.U.A. tél : 23-14-29 Bamako.  
\*\*\*

JADILANNAW :  
Alifa Yaya Jara Mamadu Kumare.  
\*\*\*

Labugunyoro  
Mali offset  
Haké : 5000  
\*\*\*

JENSENCOGO : Sayidu Tarawele  
ani Saheli jensenjekulu.

Saheli ye deme soro ka bo :  
Plan International  
OXFAM. GB. , UNICEF  
Coopération Française yoro.



nanan ntolatanciton